

# 佛說出家功德經

失譯人名今附三秦錄



南無本師釋迦牟尼佛

## 說明

本繁體校正版《佛說出家功德經》電子書，根據《乾隆大藏經》小乘單譯經，第 0771 部，失譯人名今附三秦錄《佛說出家功德經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年二月



掃碼關注仁慧草堂微信公眾號

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三編)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

### 普供養真言

(三編)

唵. 誚誚曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇  
我今見聞得受持 願解如來真實義

# 佛說出家功德經

失譯人名今附三秦錄<sup>1</sup>

如是我聞：

一時，佛在毗舍離國，食時到，入城乞食。時，毗舍離城中，有一梨車子<sup>2</sup>，名鞞羅羨那<sup>此言勇軍</sup>。譬如天與諸天女共相娛樂，時此王子與諸嫫女在閣上共相娛樂，耽於色欲亦復如是。

爾時，世尊以一切智聞彼樂音，告阿難言：「我知此人貪五欲樂者，不久命終。却後七日，當捨如是眷屬快樂，決定當死。阿難，此<sup>3</sup>人若當不捨欲樂，不出家者，命終或能墮於地獄。」

爾時，阿難頂奉佛教，欲利益此王子故，次至其舍。爾時，王子聞阿難在外，即出奉見，以敬念故，請阿難入坐。坐已未久，爾時，王子起恭敬心，白阿難言：「善哉！好親友來，今正是時。我今見汝，踊躍歡喜。汝字歡喜，汝今當教，告我佛所教法，令我歡喜。」爾時，王子如是三請。阿難為欲作大利益，默然無言。

<sup>1</sup> 大正藏：失譯人今附東晉錄

<sup>2</sup> 大正藏：車；永樂北藏及龍藏：車子

<sup>3</sup> 大正藏：如此；永樂北藏及龍藏：此

王子又言：「鞞陀阿<sup>4</sup>牟尼大仙，利益一切眾生，有何嫌恨默然無所說，不見少告？」

時，第三師持佛法藏利世間者，慘然告言：「汝今善聽<sup>5</sup>！却後七日，汝當命終。汝若於此五欲樂中，不能覺悟，不出家者，命終或當墮地獄中。佛一切智人，正語正說，記汝如是。譬火燒物，終不虛發。汝諦思惟！」

時，彼王子聞此語已，甚大憂怖，愁憤不樂，受阿難教：「我當出家，定且聽更六日受樂。第七日中，我辭家眷屬，定必出家。」阿難可之。

第七日畏生死故，求佛出家，佛即聽之。一日一夜，修持淨戒，即便命終。燒香畢已，尊者阿難與其眷屬，往白佛言：「世尊！此鞞羅羨那比丘，今已命終，神生何處？」

時，佛、世尊、天人之師、一切智人，以大梵音，勝出雷鼓迦陵頻伽眾妙音聲，以八種音告阿難言：「此鞞羅羨那比丘，畏於生死地獄苦故，捨欲出家，一日一夜，持淨戒故，捨此世已，生四天王天，為北方天王毗沙門子，恣心受於五欲快樂。貪受五欲，與諸婖女共相娛樂，壽五百歲。

<sup>4</sup> 大正藏：呵

<sup>5</sup> 大正藏：聽；永樂北藏及龍藏：德；校勘：聽

五百歲已，命終轉生三十三天，為帝釋子，具受五欲，極天之樂，天妙婇女，恣意千歲。壽盡，生焰天，為焰天王子，自恣受天色、聲、香、味、觸，快心欲樂。受天二千歲已，命終生於兜率天王子，恣心受於五欲快樂，目視相欲，心自厭足，常談法語，解脫智慧，壽天中壽。滿四千歲已，命終往生自在天上，為天王子，受種種五欲妙樂，於婇女中化應恣意八千歲。八千歲已，命終生他化自在天，為天王子。此第六天，其中欲樂，下五天中所不能及。生此中已，受最妙樂，眾樂之藏。受此樂時，心極迷醉，具足受於諸妙勝樂，萬六千歲。如是受樂，於六欲天，往來七反。此鞞<sup>6</sup>羅羨那，以一日一夜出家故，滿二十劫，不墮地獄、餓鬼、畜生，常生天人，受福自然。最後人中，生富樂家，財富珍寶具足。壯年已過，諸根熟時，畏惡生、老、病、死患故，厭世出家，剃除鬚髮故，身披法服，勤修精進，持四威儀，常行正念，觀於五陰、苦、空、無我，解法因緣，成辟支佛，名毗流帝。於是時，放大光明，多有人天，生於善根，令諸群生種於三乘解脫因緣。」

爾時，阿難叉手白佛言：「世尊！若當有人

<sup>6</sup> 大正藏：毘

放人出家，若有出家者，任其所須，得幾所福？若復有人，毀破他人出家因緣，受何罪報？唯願世尊具盡告示！」

佛告阿難：「汝若具滿於百歲中，問我此事，我以無盡智慧，除飲食時，滿百歲中，廣為汝說此人功德，猶不能盡。是人恒生天上、人中，常為國王，受天人樂。若有於此沙門法中使人出家，若復營佐出家因緣，於生死中常受快樂。我滿百歲，說其福德，不可窮盡。是故阿難，汝滿百歲，盡壽問我，我至涅槃，說此功德，亦不能盡。」

佛告阿難：「若復有人破壞他人出家因緣，即為劫奪無盡善財人<sup>7</sup>福藏，壞三十七助菩提法、涅槃之因。設有欲壞出家因緣者，應善觀察如是之事。何以故？緣此罪業，墮地獄中，常盲無目，受極處苦。若作畜生，亦常生盲；若生餓鬼中，亦常生盲。在三惡苦，久乃得脫。若生為人，在母腹中，受胎便盲。汝於百歲常問是義，我百歲以無盡智說是罪報，亦不可盡。於四道中，生而常盲，我終不記此人當有得脫時。所以者何？皆由毀出家故。」

<sup>7</sup> 大正藏：財；永樂北藏及龍藏：財人

「或成就無量無邊<sup>8</sup>功德，以破如是善因緣故，受無量罪，由障出家故。於此清淨智慧鏡中，為於解脫諸善法故，若見出家修持淨戒，趣解脫處，破他出家，為作留難，以是因緣故，生便常盲，不見涅槃，由毀出家故。常觀癡等十二因緣，應得解脫；以毀破他智慧眼故，破出家緣，覆慧眼故，從生至生，常盲無目，不見三界，緣障出家故。應<sup>9</sup>見五陰、二十我見，人趣正道；破出家因，壞正見故，所生常盲，不見正道。出家應見一切法聚、善法住處，應觀諸佛清淨法身；以破出家善因緣故，所生常盲，不能覩見佛法身。以因出家應具沙門形貌及與持戒清淨福田，種佛道因；破出家故，於善法中斷一切望，由是罪緣，生生常盲，由毀出家故。應<sup>10</sup>善觀察一切身心，皆苦、無常、無我、不淨；破他出家，為作留難，則破此眼。破此眼故，不見四道、四念處、四正勤、四如意足、五根、五力、七覺分、八正道、趣涅槃城。是罪緣故，所生常盲，乃至不見空、無相、無作清淨善法向涅槃城。

「是以智慧之人，知出家者應當成就如是善

<sup>8</sup> 大正藏：無邊；永樂北藏及龍藏：無量無邊

<sup>9</sup> 大正藏：出家應；永樂北藏及龍藏：應

<sup>10</sup> 大正藏：出家應；永樂北藏及龍藏：應

法，不應破壞善法因緣，獲如是罪。謂<sup>11</sup>毀破他人如是出家沙門正見因緣者，終不能得見涅槃城，所生常盲。

「若復有人滿百劫中，餘方出家，修持淨戒。若復有人於此閻浮提，出家持戒，一日一夜，乃至須臾，清淨出家，於十六分，彼百劫出家持戒，十六分中不及其一。

「若有顛倒，姪姊妹女，不應姪處，強生慳嫉，此中罪報，不可計限。若有一人，能正思惟，有出家心，欲捨諸惡；若復有人，破壞此人出家因緣，不令願滿，是罪因緣增長於前，復倍百劫。」

爾時，阿難復白佛言：「世尊！此毗羅羨那所種善根，生尊貴處，當受福樂，為過去世亦有善行？為但齊今一日一夜出家功德，受爾許福？」

佛告阿難：「汝不應觀過去因緣，於此一日一夜清淨出家故，此善根，六欲天中，七反受福；二十劫中，常受生死世間之樂；最後人中，生福樂家，壯年已過，諸根熟時，畏於生、老、病、死、苦故，出家持戒，成辟支佛。」

佛告阿難：「我今說喻，汝當善聽！譬四天下，東弗婆提、南閻浮提、西瞿耶尼、北鬱單越，

<sup>11</sup> 大正藏：誰

滿中阿羅漢，若稻麻叢林。若有一人，滿百歲中，盡心供養此諸羅漢衣服飲食、病瘦醫藥、房舍卧具，乃至涅槃後若起塔廟，種種珍寶、華香、瓔珞、幡蓋、妓樂、懸諸寶鈴、掃灑香水，以諸偈頌，讚歎供養，所得功德，若有人為涅槃故，出家受戒，乃至一日一夜所作功德，比前功德，十六分中不及其一。以是因緣，善男子當應出家，修持淨戒。諸善男子，諸須功德者、求善法者、自受法者，不應留難出家因緣，應勤方便勸作令成。」

時，諸天<sup>12</sup>眾聞佛所說，莫不厭世，出家持戒，有得須陀洹，乃至阿羅漢者，有種辟支佛善根者，有發無上菩提心者，皆大歡喜，頂戴奉行。

佛說出家功德經

<sup>12</sup> 大正藏：大

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 補闕圓滿真言

(三編)

唵. 呼嚧呼嚧. 社曳穆契. 莎訶

### 普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉  
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無觀自在菩薩摩訶薩 (合掌三稱)

南無護法諸天菩薩 (合掌三稱)

## 禮佛發願文

(一編)

歸命十方調御師 演揚清淨微妙法  
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

## 迴向偈

(一編)

願以此功德	莊嚴佛淨土
上報四重恩	下濟三途苦
若有見聞者	悉發菩提心
盡此一報身	同生極樂國

## 三皈依

(一篇)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

